



UKA 2018/22  
9. oktober 2018  
Bentiaraq Ottosen

## **Uunga siunnersuut: Erngup nukingata innaallagissiornermut atorneqartarnera pillugu Inatsisartut inatsisaat nr. xx, xx. xxx 2018-imeersoq**

(Inuussutissarsiornermut Nukissiuuteqarnermullu Naalakkersuisoq)

Nunatsinni erngup nukingata innaallagissiornermut atorneqartarnera pillugu Naalakkersuisuit siunnersuutaat imatut oqaaseqarfigissavarput:

Atassummiit siunissami aggersumi nunatsinni erngup nukingata innaallagissiornermut ineriartortitsuarneq anguniarlugu nunatsinni avatangiisinut mingutsitinnginnerusumik Naalakkersuisut suliaqarnerat nuannaarutigaarput, tamanna siunissami erngup nukingata piujuaannartinneqarnissaanik qularnaarinninnissaq anguniarlugu nunatsinni pinngortitap tunissutigisaa atorluarumallugu ineriartortitsitinissaq nukissiuuteqarnikkut peqataaffiginiarparput.

2030-imut suliaasaqarpugut nalilersugassaqaarlutalu, imaappoq inuussutissarsiuutinut suliniutit aallaavigalugit erngup nukinganik nukissiuuteqarnissaq inuiaqatigiinni pisariaqartinneqartoq annerulersinneqarnissaa anguniarlugu, nunap immikkoortuani imaluuniit avataaniit aningaasaliisartunik kajungilersitsinissamik Naalakkersuisut suliniuteqarnerat aallaavigalugu nunatsinni nukissiuuteqarnerup ineriartortitsinissaa inuiaqatigiinni siunissami pilersuinissamut qulakkeerisussaq.

Erngup nukinganik nukissiuuteqarnissamik pisariaqartitsinerujussuarput aallaavigalugu inuiaqatigiinni avatangiisinut mingutsitinngitsumik Nukissiorfiit suliaqarnerat alloriarneruvoq annertoq, taamaamat erngup nukinganik nukissiuuteqarnissaq piujuaannartinnissaa isumannaallisaanikkut, avatangiisinut, inuiaqatigiit akornanni erngup nukinganik nukissiuutaqarneq imermillu pilersuineq annertuumik siunissami uukkatarineqarnissaa Atassummiit peqataaffigissavarput.

Kalaallit Nunaat isorartoorujussuvoq, Atassummiit isumaqarpugut erngup nukinganik imermillu pilersuineq siunissami piujuaannartittariaqarippit, alloriarneq nunatsinni anguneqassaaq illoqarfiit erngup nukinganik imermillu pilersorneqartut ineriartorteqqikkutsigit.

Eqqaamassavarputtaaq erngup nukinganiinnaq pinngortitamut mingutsitsinngitsumik nukissiuuteqarniarneq periarfissaanngimmat. Allat eqqaaneqarsinnaasut ammaffigisariaqakkavullu tassaapput seqerngup qinngorneranik nukissiuuteqarneq, immap sarfaanik nukissiuuteqarneq,



anorisaatillu atorlugit innaallagissamik pilersorneq. Taakkulu CO2-mik aniasitsinermik annikillisaataassapput.

Taamatut oqaaseqareerlunga, una siunnersuut ataatsimiisitaliamut susassaqartumut ingerlateqqinneqarnissaa innersuuppara.